

A2<sup>r</sup>

Martinus Butzer  
 ain diener der Kirchen Chrifti zû  
 Straßburg/ zû dem Chriftlichen lefer.

GNad vnd frid von vnnferem Herren  
 Jefu Chrifto/ mehre fich bey allen/ die feines  
 reychs begeren/ Amen. Wie vnnfer Herr vnd  
 Hayland Jefus Chriftus vns tåglich fein gnad  
 vnd gayft reychlicher beweyfet/ mit fo vnuerfe-  
 henlichem vnd wunderbarlichem fürgang fei-  
 nes reichs/ wider alle taufentlift vnd gewalt des alten feinds/  
 also feyret auch der selbig alt feind/ zerftörer vnnd todſchleger  
 nicht/ über das auffer wüten vnd blütuergieffen/ das er alle-  
 mal wider die/ fo den Herren als ainigen Hayland anruffen/  
 an manchen ortē graufamklich erwecket/ vnerhörete vñ gantz  
 erfchröckliche ergernuß falcher leer einzufüren/ vnd vnderlaß-  
 fet ja aller dingen nicht/ damit er dem zûweren verhoffet/ das  
 die verirretē ſchâflin Chrifti recht wider verfamlet/ bey ain ge-  
 halten/ vnd also mit der wayde rainer Chriftlicher lere zû aller  
 gotfåligkait gewaydet/ vnd vor allem vnhat an leib vnd feel  
 Vnd vnder anderem/ hat er nun auch das auffbracht/ das  
 ettwan vil gûthertziger gotsföchtiger leüt/ durch ettliche feine  
 werckzeug/ alzumal vermeffen fträfler in dem verirret werden/  
 bewahret würden.

Vnd vnder anderem/ hat er nun auch das auffbracht/ das  
 ettwan vil gûthertziger gotsföchtiger leüt/ durch ettlich feine  
 ob die oberkaiten/ fo das ſchwert tragen/ ſich in jrer regierung/  
 der religion Chriftlicher lere vnd lebens auch weyters annemē  
 follen/ dañ fo vil allain/ als jnen darzû vō nōten fein wille/ das  
 ſy aufferen leiplichen fridē/ der doch auch vnder den vngleubi-  
 gen beſtehn kan/ bey den jren erhaltē/ Vnd würt fürgeben/ fol-  
 che obren hebē allain auf den eüfferen friden zû fehē/ das man  
 in leiplicher rûwe bey vnd mitainander leben künde/ was man  
 joch glaube/ oder ſich gegen Gott beweyfe/ vnd follen ſich des  
 reichs Chrifti an jm ſelb/ von ampts wegē der oberkait/ nichts  
 vnderziehen.

Wa Gott  
 die war-  
 hait da trei-  
 bet d<sup>9</sup> Sa-  
 tan die lu-  
 gen.

Newer irr-  
 tumb das  
 ſich die obe-  
 ren der reli-  
 gion nichts  
 beladen fol-  
 len.

A2<sup>v</sup>

Wie die obren die gotfälligkeit für deren mögen.

Diß kömet layder/ vnd wirt yetzund erwegt/ daher/ der anrichter aller zerrüttung/ vnnd feynd aller fäligen ordnungen/ waißt wol was groffen hails Gott ye vnd ye durch gotfälligen obren/ bey den menfchen gefchaffet hat/ vñ wie leicht die obren fo nach Got eyfern/ zû allen zeytē die ergernuffen falcher lere/ welche/ wie der Krebs/ vmb fich yffet/ vñ auch des lebens/ damit nit ain wenig laurtaig/ den gantzē taig verfeüre/ verhüten vnd abfchaffen/ vnd dagegen verfehen mögen/ das jre vnderthonen recht Chriflich geleret/ mit den ordenlichen Kirchen yebungen/ vnd allerlay güter anraytzung zû der waren gotfälligkeit gantz fruchtbarlich angefüret werden/ Auß welcher vrfachen die fchriff die obren Götter nennet. Dañ wie die obren im höchften gewalt feind/ alfo follten vnd künden fy/ auß beyftand des hailigen fürftlichen gayfts/ den jnen Got/ fo fy darumb mit dem König Daudid/ bitten/ fampt der hilff feiner hailigen Engel/ nit verlagt/ mit jrem dienft der regierüg/ den leütē am höchften zû allem güten verhelffen/ vnd zum fürnâmfte zû warer religion vñ aufgang des reichs Gottes/ wie dañ den menfchē überal nichts güt noch nutz fein mag/ wa nit vor allem/ das reich Gottes vnd fein gerechtigkeit gefücht wirdt/ dañ da allain/ da man difes zum erften fûchet/ muß alles das/ fo man weyters bedarf/ vnd ymer mit hayl begeren mag/ auß gnädiger fchickung Gottes felbs zûfallen.

Die obren machen dz volck fündē od' recht thûn/ nach dem fy die religiō anftellen.

Vnd eben auß difem grund/ das es Got alfo gefallen hat/ fo vil an den dienft vñ beuelch der obren zûftellen/ vnd den felbigen fo weyt zûgebrauchen/ wie in andren menfchlichen hendlen/ alfo fürnâmlich in der religion/ fchiltet die fchriff den Jeroboam/ welcher den falchen gots dienft bey den gulden Kelberē hatte angericht/ er habe Jrael gemacht fündē. Alfo werden Ezechias vñ Jofias fo hoch gelobt das fy das volck wider zur Gotfälligkeit gefüret/ vnd den bund Gottes mit jn wider aufgerichtet haben/ daß das volck nach Got wandlete/ vnnd feine gebot hielte von gantzem hertzen vnd feel. Welchen gotfälligen Königē die fchriff auch das zûgibt/ das fy hiemit/ das fy fich der religion fo ernftlich angenömen/ vnd alle falche leer vnd gotsdienft mit fo großem eyfer abgefchafft vñ geftraffet/

A3<sup>r</sup>

den verdienten zorn Gottes zum thail abgewendt/ zum thail aufgezogen haben.

Sollich groß güt vnd gantz notdürftigen dienft der obren/ wolte vns der Sathan gern abwenden/ auch bey den güther<sup>z</sup>tzigen vnd gotfåligen obren/ damit er feinen raum/ alles ver<sup>z</sup>derben über vns zuführen/ desto baß habē möchte. Gibt darüb auch den obren feinen tittel/ vertuncket damit vñ raubet jnen den jren/ nennet fy weltlich obren/ wie der hailig Paulus die böfen gayfter nennet κοσμοκράτορας/ welt regentē oder weltlich obren/ fo fy Got felb nennet Götter/ ordliche obren/ vnd gewaltigen/ die er wille vätter vnd hyrten fein feines volcks/ vnd feiner schåflin/ welche er von der welt erwõlet hatt. Die felbigen follen die obren alfo wayden vñnd regieren/ das fy die vor der welt bewaren. Die welt fo gantz ins böß gefetzet ift/ Gott den vatter vnd Chriftum den Herren haffet/ laßt sich nit regieren/ das ift/ zũ rechter ordnung anrichten/ fonder allain muß fy jr laffen etwan des argen zum thail eufferlich wehren.

Weltlich obren find die teüfel.

Nun als der böfe feynd/ sich allweg zum Engel deß leychts vertellen kan/ wie auch feine Apoftel zũ Apoftolē Chrifti/ wendet er/ feine verführung auch inn difer sachen/ darzũgeben/ gar schöne vnd Chriftliche reden für/ als da feind/ das reych Chrifti vnfers Herren ift nitt von difer welt/ fteht nitt inn eufferem thun/ fonder im hertzen/ der h. gayft muß das regieren vnd bewaren/ Die gotfåligkait muß freywillig vnd onzwungen fein/ Vnfer Herr Chriftus vnd die Apoftolen/ auch die hailigē martyrer vnd leerer habē das h. Euangelium vnd Chriftlich leben zufürderen/ kayne obren ye angeruffet/ das reych Chrifti folle man durch den gaift vnd das wort fördren/ nit durch verfolgen vnd zwingen. Welches alles zũ gütem verftand/ war/ vñ recht geredt ift/ nichts ift aber in denē reden allen/ darauß volge/ das der Sathan will/ das nämlich die obren sich des reichs Chrifti/ der waren Religion/ in regierung nichts beladen foltē/ fonder das widerfpil/ das die obren nichts als mit fo höchstem ernft verchaffen follen/ als/ daß das reich Chrifti/ bey den jrē ymer fürbracht vnd erbawen werde.

Die fürnämeften argument des gegen thails.

Welches ich vormittels götlicher gnaden yetzund in ettlichē

A3<sup>v</sup>

Dialogi  
Buceri vō  
difer fachē

Dialogis aufs kläreft vnnd auch freündtlicheft/ auß göttlicher gefchrifft/ zubeweyfen fürgenōmen hab/ lampt dem/ das ware Chrifliche Religion allweg erfodret/ vnd wa fy ift/ gewißlich mit bringet/ das fich die leüt hertzlich mit ainander/ auch eüferlich thũns/ verainigē/ zufamen haltē/ mit aller andacht gemeine predigen/ gebett/ der hailigē Sacramenten/ vñ andere Kirchen übungen/ befuchen/ vnnd auch wunderbarlich daher in rechtē glauben an Chriftum vnnfern Herren/ der dañ durch die liebe zũ allem gũten thätig ift/ geftercket vñ gefürdet werden. Dabey will ich auch/ auß beyftand vnnfers Herren Jefu/ auß göttlicher gefchrifft/ vnd auch der Chriflichen Kayfer gefetzen gnũgſam anzaigen/ wes die vndren oberkaiten on verletzung der waren gehorfamy/ auch on ainig zerrüttung gũter Pollicey/ gegen den obren oberkaitten/ in fachen der Religion vnd betterung der Kirchen zuhandlen haben/ vñ mit der hilff Gottes/ wol auch gantz ſchleünig vnd fridlich vermügen.

Als aber auß anregen des vatters der lugen/ die anriffter difer irrthumb vil der einfältigen/ auch damitt hinders liecht zũführen vnderftehn/ das fy fürgebē/ die alten h. vāter/ habens auch alfo gehalten/ das die obren fo das ſchwerdt tragen/ mit folchem jrem ampt/ in fachen deß glaubens vnd der Religion nichts zuthũn haben/ damit wol vnd im grund erkennet werde/ das folchs den hailigen vāttern vñ leerern neben der warhait zũgemeffen wirt/ hab ich meinen besonders lieben brüder vnnd mitarbeiter am h. Euangelio/ Wolfgang Meußlin/ ain diener der Kirchen zũ Augſpurg/ vermügt/ ins teütſch zubringen/ vnd dannocht in truck zugeben/ die nachfolgende gefchrifft deß hailigen Auguftini/ die der hailig leerer an den Kaiſerlichen kriegs Grauen Bonifacium/ gethon hatt.

Erat Comes  
rei militaris,  
de cuius officio uide  
cod: li: 12.  
tit. 12.

In difer gefchrifft erweifet difer hailig leerer/ mit heller göttlicher gefchrifft/ das die obren/ auch durch das Ampt der oberkait künden vnnd follen das reych Gottes fürdren/ irrthumb/ falſche leer/ vnd alles gotloß wesen abtreiben/ die leüt anhalten/ das fy die leer der warhait hören/ fich in gemain der Chriſten/ die weyl fy fich deß namens Chrifti berhümen wöllē/ thũen/ vñ Chriflicher zucht vnderwerffen/ vñ das die forcht vnd

A4<sup>r</sup>

traf der oberkeit zufürderen die ware felbwillige gotfåligkait/  
hoch diene/ das folches auch Chrifto vnferem Herren gefalle/  
vnd auß feinem gaift alfo verhandlet werde/ ob wol er vnnd  
feine h. Apoftolen diß bey kainen obren/ die dañ der zeyt/ wiß  
der jn vnd Gott wüteten/ erfucht haben/ was vnderfchayd  
auch fey/ zwifchen billicher ftraff des argen/ das ift/ der verfol-  
gung vmb der vngerechtigkait willen/ vnd ftraffen des gütē/  
das ift/ der verfolgung vmb der gerechtigkait willen/ fampt  
anderem/ das zû aigentlichem vn̄ gegründtem verftand difes  
handels hoch dienftlich ift.

Dife gefchrifft des h. Auguftini wirt ainen yeden gûthertzigē  
wol berichten/ nit allain/ was der alten hailigen leerer haltūg  
in difer fachen gewefen fey/ wie dañ difer h. Bifchof/ feiner vor-  
faren vnd der gemain haltung der Kirchen zum höchften be-  
uor gehabt hatt/ fonder auch was vns Gott felb inn feiner h.  
gefchrifft von difem handel leret/ als auch zwar difer hailig  
leerer/ vnder allen/ die zû Latein gefchriben/ vn̄ deren gefchri-  
ften wir noch haben/ fich zum wort Gottes mit ernftē fleiß ge-  
halten/ auch vor andren aufs gründtlicheft nach der leer Got-  
tes in allerlay fachen befchaid gegeben hatt. Dañ wir auch  
nit wolten/ das yeman difen h. leerer/ oder ainigē andren/ weñ  
der gleich noch vil hailiger vnnd gelerter wāre/ vnd auch mitt  
jm ftymmeten alle Engel vn̄ hailigen/ fo ye gewefen/ feind/ vn̄  
werdent/ das wenigelt glaubete/ oder vmb feinet willen an-  
neme/ da er nit erkennē mochte/ daß das ainig/ fo folcher leerer  
fürgibt/ auß dem vnfålenden wort Gottes gewißlich vnd on  
allen zweifel fluffe vnd auff dem felbigen beftande.

Diß wölleft Chriftlicher lefer mitt vnpartheylchem gemût  
lefen/ alles vor Gott erwegen/ vor allem auch den h. gayft dar  
zû anrűffen/ feind wir vngezweiflet/ du folt dich an difem lefen  
hoch befferen/ vn̄ ob dich noch ettliche/ newlich erdichte einre-  
den irren wolten/ habe gedult/ als bald follen/ ob Got will/ die  
Dialogi von mir/ deßhalb fürgenōmen/ auch außgehn/ dariñ  
du folchs alles weytleüffig/ vnd mit grund götlicher gefchrifft  
verantwortet finden würft.

Vnd noch ains will ich dich im Herren betten vnd ermanet

Innhalt  
volgender  
fchrifft Au-  
guftini.

A4<sup>v</sup>

All irrüb  
kömen vō  
Sathan.

haben. Dieweyl ich nit zweyfel vor Got meinē Herren/ das diß ain schwärer hoch verderblicher irrthüb feye/ wöllē das ampt der obren also von der Religion abziehen/ kan ich erfliche auf bringung folcher mainūg nyemandts anders zůschreiben/ dañ dem Sathan/ dem vater aller lügen/ Diß soltu aber also verstehn vñ aufnehmen/ das du darüb nit hinwerffest die/ so schon mit folcher irrthüb behafftet sein möchten. Zwar was wir alle laider sündigen/ ist auß irrthumb vnd falschem wohn/ der vns auch freylich auß Gott nitt kömet/ fonder dem Teüfel/ dero halb der Herr vnns alle/ vnnd täglich/ ja on vnderlaß/ betten haiffet/ füre vns o himlischer vater nit inn verfühung/ fonder erlöfe vns von dem bösen/ von dem arglistigen/ nymer feyrenden/ vnd allweg obligenden verführer vnd anstifter alles argen/ wir haben alle nit allain mit blüt vnd flaisch/ fonder mit den bösen arglistigen gayftern vnnd gewaltigen der welt zुकempffen. Der ist allain deß Sathans frey/ der aller sünden frey ist. Darumb wir ain mitleyden mit ainander haben sollē/ für ainander getrewlich betten/ ainander freündtlich vñ mitt aller bescheidenhait der warhait Christi berichten. Der nye irrete/ ist Got allain/ vñ irret dein brüder in dem/ so irrest du dich in aim andren/ vñ villeicht gröfferem. Es seind auch zwar nit schlecht scheynende vrfachen/ damitt diser irrthumb fürgeben wirt. Sumā/ irrthumb vnd falsch sollen wir mit höchstē fleyß von vnfern nächsten vnderstehn hinzunemen/ vnnd aber sy den Herren zugewinnen/ vnnd das mitt folcher gelassenhait/ freündtlichait/ vnd doch auch ernstlichem eyfer/ vnd göttlichē anhalten/ wie das gemeß sein müge/ der liebe/ die wir alle ainander schuldig seind/ die so groß sein solle das wir sollen bereit sein/ nach der ordnung deß Herren vnser blüt fürainander zú vergießen/ wa wir ainander damit zú Gott helffen kündten/ wie dañ vnns vnser Herr Jefus auch gethon hat/ Der sey mitt vns allen/ vnd leere vns/ sich allain in allem sūchen vnd finden/ Amen. Augspurg/ auff den. 10. tag des Mertzen. 1535.

B1<sup>r</sup>

Innhalt difes nachfolgenden Büchlins/ fo der  
 hailig Auguftinus dem Grauen Bonifatio zů gefchriben hat/  
 ift difer. Er zaigt jm an/ wie der Donatiften Sect mitt den  
 Arrianeren kain gemainfchafft hab/ vnd mit was máffigkait  
 vnd gefchickligkait die Roten zur einigkait vñ gefellfchafft der  
 Kirchen widerüb bracht werden mögen/ Vnd demnach  
 von der Donatiften vnd Circumcellioner wütten-  
 den graufamkait. Zů letft aber von der Sünd  
 in Hailigen gayft/ die nit verzigten werde.  
 Diß Argument hat er auch in der  
 48. Epiftel zů dem Vin-  
 centio gehandelt.

Das Erft Capitel/ Was vnderfchaidts fey  
 zwifchen den Donatiften vnd Arrianeren/ fo vil  
 die hailigen tryfáltigkait belanget.

DAs du/ mein geliebfter Bonifaci/  
 mitten in den gefchefften fo Krieg vnd Kriegß  
 rüftung belangend/ alfo hefftig was Got zů ge-  
 höre/ zuwilfen begereft/ lob ich vñ erfrew mich/  
 ja verwundert mich auch. Hierauß befindt fich  
 warlich/ das du auch mit deinem Ritterlichen  
 vermögen/ dem glaubē fo du in Chriftum haft/ dieneft. Damit  
 ich nun deßhalb kürztlich deiner liebe anzaigung thūe/ was  
 vnderfchaidts zwifchen der Arrianer vnd der Donatiften irr-  
 thumb fich halte/ fo merck alfo. Die Arrianer fagen/ das der  
 Vater/ vnd der Sun/ vnd der Hailig gayft/ nit habē ain ainig-  
 ges wesen oder fubftantz/ fonder yeder ain befonders. Die Do-  
 natiften aber fagen difes nit/ fonder bekennen in der dreyhait  
 ain ainigs wesen. Vnd ob wol ettlich auß jnen gefprochen ha-  
 ben/ es fey der Sun minder dann der Vater/ haben fy doch nit  
 geleügnēt jnen ains wesen mit dem vatter fein. Gar vil aber  
 von jnen bekennen/ wie fy gentztlich das vom vater/ Sun vnd  
 hailigen gayft glauben vnd haltē/ das die allgemaine Chrift-

Was vn-  
 derfchaidts  
 fey zwifchē  
 den Arri-  
 aneren vñ  
 Donatiftē